

ARTISTANAN LOCAL A HAYA ENTRADA NA ARUBA BEACH CLUB

ORANJESTAD(AAN)—Dos siman pasa Aruba Beach Club a habri porta di La Taverna Disco-lounge, pa artistanan local, y ariba e prome anochi di e shownan cu lema di "Duna artistanan local, e balor mereci" a logra exito grandi caba.

E prome show tabata di Gabriel Flores, mientras cu weekend cu a pasa, Abel y Brenda Noguera a deleita e publico cu nan cancionnan.

E programa semanal aki ta ser produci pa e locutor reportero Angel Coronel.

Segun informacionnan intencion ta pa tene shownan di nos artistanan local tur diasabra anochi pa resto di e aña aki, y tambe cu ya tin un lista basta largo di artistanan local pa ocupa e shownan e simannan venidero, di manera cu tur por haya oportunidad y no solamente un grupo selecta.

Pa e siman aki no ta cla ainda cu deliberacionnan cu e artistanan cu lo tuma parti den e show diasabra anochi, y asina cu esaki ta conoci, lo menciona kendenan ta ser presenta diasabra awor.

CABARET PICANTE TIN DOS PRESENTACION MAS

ORANJESTAD(AAN)—Cabaret Picante II a pasa den un weekend masha exitoso y diamars anochi a tene otro show cu sala completamente yen, mientras cu hopi hende a bay cas sin por a logra carchi pa e presentacion.

Como cu ayera integrantenan di e grupo continuamente tabata ricibiendo peticion pa presenta e Cabaret un biaha mas, y debi tambe na e bon reaccion di parti di publico a ser dicidi pa tene dos presentacion cu lo ta e ultimonan.

Fecha pa e presentacionnan aki no ta definitivo ainda pesey no por publica esaki awe.

E dos presentacionnan lo ta alrededor di fin di e luna aki of cuminzamento di otro luna.

A ser pensa pa tene e shownan e weekend aki pero como cu hopi hende a pidi pa warda te fin di luna, debi na e fiestanan di santa comunión, dia di mama y otro actividadnan cu tabata tin e luna aki.

Tabata trata di un luna largo di cinco siman tambe. Hopi peticion a ser ricibi tambe di personanan cu kier a mira e show un biaha mas algo cu a pasa tambe durante presentacion di Cabaret Picante I aña pasa unda tabata tin hendenan cu a mira e show dos of mas biaha.

Asina cu confirma fecha lo cuminsa pasa e propagandanan relaciona cu esaki.

BREAKDANCE CONTEST

ORANJESTAD(AAN)—Diasabra venidero pa 4 or atardi ta cuminsa den Club Scaramouche un Breakdance contest cu participacion di Up Rock, Trouble Streetbreakers, The Warriors, Dinamic Kicks y posiblemente cu mas grupo cu lo inscribi.

Ganadonan di e concurso di breakdance aki lo competi diadomingo atardi contra un grupo di Curacao cu lo ta di bishita pa competi cu e mihor di Aruba.

Segun DIARIO tin entendi e grupo "Trouble" tin masha mal intencion, ya cu nan a laga sa cu ta trouble nan ta bin busca pero den forma di baile pa causa e disaster necesario durante e show cu ta ser titula "Disaster Show".

E show aki lo ta di 4 or pa 8 or anochi.



Aki por mira e delegacion di Aruba cu a sali pa Sto Domingo pa participa den e Festival di Turismo cu ta consisti di exhibicion di F.I.D.O.T.U.R., presentacionnan folklorico di diferente pais, eleccion Miss Turismo del Caribe y Centro America Etc. Aruba lo tuma parti na tur e acontecimentonan, danki na e cooperacion cu Gobierno di Aruba a ricibi di ALM, fundacion Centro Cultura y Ministerio di Turismo di Sto. Domingo.



Como resultado di e festival internacional di teatro cu e fundacion Centro Cultural di Aruba a organiza cu bastante exito na october aña pasa, contactonan a ser haci cu e presidente di jurado internacional di dicho festival, pa eventualmente durante 1985 bin dicta un taller di teatro na Aruba. Ta trata aki di un arquitecto di Paraguay, Sr. Agustin Nuñez Talavera kende a studia direccion di teatro na e conservatorio di teatro di e Universidad Nacional na Rio de Janeiro, Brazil. E experto aki a yega di cursa estudionan tambe cu profesornan mundialmente conoci, manera entre otro Augusto Boal na Argentina, Enrique Buenaventura na Paraguay, Alwin Nikoalis di e "dance theatre of New York", Bernd Herberger di e teatro di Camara di Munich, na e "Piccolo teatro di Milano, Italia. Mientras e tabata invitado na e 16 festival mundial di teatro na Sitges, España na 1983 tambe.

Pa e workshop di teatro na Aruba cu un duracion di 6 simantabata existi asina hopi interes cu envez di un workshop tabata necesario pa organiza dos taller, na unda miembronan di gruponan di teatro, maestronan di school, trahadornan di centronan di barío y amantenan di teatro ta asistiendo. E workshop ta encera entre otro dinamica di grupo, expresion corporal, elementonan di actuacion, ejercicionan di voz, maquillahe y escenografia. Sr. Nuñez Talavera kende na Bogota, Colombia ta director di un centro di expresion teatral cu tin un seccion infantil/juvenil, ta un experto tambe ariba tereno di titeres(poppenkast) y tabata dispuesto pa durante su estadia na Aruba duna un workshop encuanto esaki na unda un grupo di maestranan di kleuterschool, y lidernan di organizacionnan juvenil ta asistiendo. Fundacion Centro Cultural di Aruba ta spera cu e tallernan di teatro y poppenkast por stimula mas ainda e interes na Aruba den e direccionnan aki, muy en especial den e aña internacional di juventud.